

Wie mer send

Wie mer send

Wie mer vergässe
wie mer erennere
wie mer öis druushalte
ond weder fende
im Versueche
öis verbende
gärn chli länger
nochli schteller aber
doch glii wiiter
müend.

Was mer sääge
was mer meine
ond verschwiige
nie verschtönd.
Wo mer lose
ond ned ghööre
i de gliiche
Schprooch verloore
iigesperrt send.

Wie mer triibe
wie mer schtrample
wie mer frooge
ond behaupte
wie mer lüüchte
ond verdonkle
wer mer send.

Nömme

Es esch jetzt nömm
schöön wie s einisch
schöön gsii esch oder loschtig
onder de Böim ond
guet Chriesi ässe.
S het jetz e zwöiti
Schpuur ggee wo
emmer metschwengt
sech i di anderi ine
bringt mee Informatione
früeneri Zueschtänd kännt.
Was esch langsam was
esch schnäll? Wie öppis
schmilzt wie d Ameisi schaffe?
I de Nacht räägnet s eso
fescht dass Äsche
a d Fänschterschiibe schprötzt.
Alles Zerkulatione au
d Grüüsch os de Träum. Ond
en Onrue tief enne drenn so
dass d Muetter seid me söll
emol abe choo ond näbe d Rose
setze. Dööt müessi me nüüt.
Aber me weiss: De ruigi Morge
esch gnauso gföörlech
wie de luut.